

Date – 29/11/2025

Time - 18:30 Hrs

HEADLINES (EVENING)

1. Chief Minister Pu Lalduhoma chu Bharat Scout & Guides chawimawina sang ber Silver Elephant Award hlan a ni.
2. Lai Autonomous District Council inthlanpui vote thlak ni karleh nilaini atana inbuatsaihna ngawrh taka kalpui chhunzawm a ni.
3. Prime Minister Narendra Modia kaihhruiin All India Conference of Directors General an Inspectors General of Police vawi 60-na Chhatisgarh-a Raipur ah tan a ni
4. Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme a hmang leh dawn.

<><><>

CM

Chief Minister Pu Lalduhoma chu Bharat Scout & Guides chawimawina sang ber Silver Elephant Award hlan a ni. Uttar Pradesh state khawpui, Lucknow-ah Bharat Scout & Guides kum 60 tlin lawmna leh 19th National Jamboree a ruala hman a ni a, Chief Minister hi President Pi Droupadi Murmu in Silver Elephant Award hi a hlan a ni.

Chawimawina lehkhaah hian Chief Minister Pu Lalduhoma hnena he chawimawina an pek chhan chu Bharat Scout & Guides hmalaknaa a thawh that chungchuan vang (Most Exceptional Service) a nih thu a inziak a ni.

Pu Lalduhoma chuan Mizoram mipui, khua leh tui tha, ram leh khawtlang tana inpe zo, midangte nena thawhho thiam, mahni inphata midangte tanpui tura inpeih reng thinte vangin chawimawina a dawng a ti a, A mimal hlawhtlinna ah a ngaih loh thu sawiin Mizoram mipuite hlauh chhuah zawk a ni a ti a, Mizorama Bharat Scout & Guides hotute leh Sports & Youth Services department te thawhrimnaah lawmthu a sawi bawk. He chawimawina hi Mizo pasarihin an lo dawng tawh nia hriat a ni a. A dawng hmasa ber chu Pu Hrangthanga (L) niin kum 2000 khan a dawng a, Chief Minister hma chiah hian Pi Lalrosangin kum 2017 khan a dawng a ni.

<><><>

GOVERNOR

Larsap Gen. (Rtd.) Vijay Kumar Singh hovin vawiin khan Indian Red Cross Society (IRCS), Mizoram State Branch Annual General Meeting hmasa ber Rak Bhawan Durbar Hall ah neih a ni a,

Thusawiin Larsap chuan rikrum thila che chhuak thei tura Mizo tawng ngeia inzirtirna first aid tutorial video 6 lai tlangzarh a ni chu lawmawm a tih thu a sawi a. Red Cross Society member te chu infuih phur tawna mi tam tak hriat an hlauh theihna tura thawkrim turin a chah a. An thutkhawm leh huna hmasawna duhawm tak hmuh theih ngei a in beisei thu a sawi a ni.

Vawiin IRCS Mizoram State Branch Annual General meetingah hian tun dinhmunah IRCS Mizoram State Branch hnuaiah life member 18 leh Aizawl khawpui chhung College pathum - Govt. Aizawl College, Govt. Aizawl North College leh Govt. T. Romana College - atangin Youth Red Cross Unit member 100 chuang hret an awm mek thu tarlan niin, member neih belh dan turte sawi ho a ni a.

Aizawl District mai bakah district zawng zawngah Deputy Commissioner kaihhrui Red Cross Society din vek a nih theih nana hmalak nise tih niin, zau zawka tanlak a nih theih nan YMA leh NGO dangte nena thawhho dan ngaihtuah nise an ti a. Remchang hmasa berah Huhliap short stay-ah first aid training buatsaih nise tih niin, half marathon buatsaih tha an ti bawk.

Meeting chuan Mipuite'n tun aia zau zawka Red Cross Society an hmelhriata an rawn tel ve zel theih nana pawimawhte sawi ho a ni.

<><><>

TERRITORIAL ARMY

Mizo Territorial Army lak hna chu tluang taka kalpui a ni a, kumthar January ni 18-ah written exam buatsaih a ni ang.

Territorial Army, Aizawl Company Officer in Charge Lt. Col. Goldi Bora chuan vawiina a pisaa chanchinbumite a kawmnaah he thu hi sawiin Mizo Territorial Army atan mi 2700 chuangin hming an pek thu leh heng zinga tam takin physical leh medical test paltlangin written exam an hmachhawn dawn a ti a. A zat chiah chu an lakkhawn mek thu sawiin chiang zawka an tarlan thuai theih a beisei thu a sawi a. Territorial Army lak hna kalpui mek chu a felfai thu leh an hotute pawh an lawm thu a sawi a ni.

Lt. Col. Goldi Bora chuan Mizoram chhunga mi chi hrang hrangin an hna lak mek thalaiten an hriat theihna turin a thehlar lamah tan an lak nasat thu leh lawmawm a tih thu a sawi a. Mizo mipuite tanrualnaah lawmthu sawiin hna lak kawngah pawh harsatna liantham han sawi tur a awm loh thu leh a felfai thu a sawi a. Mizo hmeichhia tam takin an dil ve chu lawmawm a tih thu a sawi bawk a ni.

Lt. Col. Goldi Bora chuan Territorial Army hna lak mekah Mizoram Youth Commission in written exam hmachhawn tur te tan Crash Course an siam chu lawmawm a tih thu leh an mamawh ang resource pawh an theih anga an pek dawn thu a sawi a. Hna lak ringawt an buaipui loh thu leh Aizawla an rawn luh tirh atangin hmun hrang hrangah vantlanga tana thil tha tiin outreach hun hrang hrang 27 lai an huaihawt tawh thu a sawi a ni.

<><><>

LADC

Lai Autonomous District Council inthlanpui atana inbuatsaihna kal zelah vawiin khan District Election Officer Pu Donny Lalruatsanga hovin District Level Standing Committee an thukhawm a,

DEO chuan inthlanna fel fai leh tluang tak a neih a nih theih nan Election Official-ten theihtawp an chhuah reng tih tarlangin, NGO - te nen an thawhhona a that thu a sawi a, inthlan Model Code of Conduct pawh khauh tak a kalpui mek a ni a ti a, Political Party - lam pawhin an zawm tha hle nia a hriat thu a sawi.

DEO chuan India ramah mipuiten an aiawha roreltu an thlan thin angin inthlanna neih fo a ni a, hemi kawngah hian Official - te leh NGO - te inkarah thawhhon tha a awm zel a pawimawh tak zet a ni, a ti a, NGO, Political Party leh Mipuite thawhpuih a sawm nghal a ni.

Superintendent of Police (SP) Pu PC Lalchunglura chuan dan leh thupek kenkawh kawngah theihtawp chhuah mek zel a ni, a ti bawk a. Tun dinhmunah Security Duty - tur te ruat fel vek tawh a, a tul dan a zir a indah belh ngaite pawh dah belh zel a nih tur thu a sawi a. Security Duty - tur te tan naktukah Training runpui neih a nih tur thu a tarlang bawk.

Election Officer Pu Collin Hlychho sawi danin, Polling Team - tan training vawihnih neih a ni tawh a, thawhtanni khian an duty na tur hmuna an chhuak tan tawh dawn a ni, a ti. Security, Driver leh Polling Team - ten vote an thlak tawh a, vawiin lamah pawh thlak chhunzawm a ni, a ti.

Nimin khan Presiding Officer, First Polling Officer leh Second Polling Officer-ten Government Region Higher Secondary School -ah training hnukung neiin, dar 11:00 AM atanga tlai lam dar 4:00 PM inkarah vote an thlak nghal a. Vote tla zawng zawng hi - 263 a ni.

Hetihlai hian Political Party te pawhin vote zawn beihpui an thlak chho mek a, tukin khan MNF Treasurer Pu Lalruatkima chuan Lawngtlai Areopagi-ah thusawiin, Central Young Lai Association duh loh dana FCAA pass luitu ZPM hi hnawl ngam turin Laifate a ngen a. Tun hi FCAA in duh lohna lan tir hun a ni, a ti. FCAA hmanga Zofate leh Laifate an inhung bikna tihchhiatsak vektute chu hnawl a tul a ti.

<><><>

CHAMPHAI LEGAL METROLOGY

Champhai District Consumers Union leh Champhai Legal Metrology pisa te hmalaknain Mipui ten sa leh thlai hrang hrang te Buk tling ngei a an lei theih nan endik hna thawh a ni.

An endikna hmun hi Champhai Bazar hrang hrang - Awmpui pheih Bazar, Venglai Bazar leh Bethel Kawn Bazar -ah te niin Vawksa, Arsa, Bawngsa, Kelsa, Ui sa Sangha leh thlai zuartute Bukna an endikah, buk tlinglo leh Mau hmang a bukna siamchawp hmang thin mi 5 man an ni a, Legal Metrology office ah tih fel ngai tifel turin mi 7 an ko bawk. A bik in Bawngsa leh Vawksa bukna erawh a tling tha hle a ni.

Bazar hrang hrang bukna endiknaah hian Champhai Dist. Consumer Union President Pu C. Lalthawmliana leh OB dang Pa nga an tel a. Anni bakah hian Legal Metrology Asst. Controller Pu Lalfakzuala leh Legal Metrology Inspector Pu Felix Lalruatsanga leh thawktu dang 4 an tel bawk a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve ah Chanchinthar puan leh a ni ang.

<><><>

NEWS

Akashvani Aizawl Regional News Unit in Aizawl Hnahthial, Chawngte, Vairengte leh Champhai North atana Part Time Correspondent a lak tur te interview chu Dec ni 3 khian neih a ni dawn a, diltute chu Dec ni 3 chawhma dar 10.30 ah document kimchang nen Office ah thlen kim tur a ni.

<><><>

PM

Prime Minister Narendra Modia kaihhruiin All India Conference of Directors General an Inspectors General of Police vawi 60-na Chhatisgarh-a Raipur ah tan a ni a. He hunah hian Prime Minister Modia chuan session hrang hrangah hun a hmang bawk a ni.

Nimin khan Union Home Minister Amit Shah chuan ni thum awh tur he conference hi a hawng a. Kuminah hian thupuih Viksit Bharat: Security Deimensions tih chu hman a ni a. Ram chhunga Police te dan leh thupek kenkawh dan dinhmunte, ramchhung himna chungchangte, firfiaka chetna do dan tur te, Left-Wing Extremism lamte, disaster Management, hmeichhe himna, leh forensic science leh artificial intelligence chungchangte ngaihtuah ho a ni ang.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 128-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>